

Yunghsim Dingq Ndwenngoenz

□ Veiz Haijlanz / 韦海兰

Byaij haeuj seizdaih moq, saed-ceij vunzlai gvaq ndaej engq lai saek lai yiengh lo. Hoeng, vunz seizneix guh maz dingzlai cungj dwg gaenj-gaenj gipgip, yied vaiq yied ndei, couh lumj daengx aen ndwnj makcauj nei, mbouj rox gij feihdauh de baenzlawz yiengh.

Haetromh ngamq ndiu, gou roxnyinh ngoenzneix mbouj miz maz hong nyaengq, ndigah gag ninz youq gwnz congz laep da dingh youq yaep ndeu.

“Cijceuj…… cijceuj…… cijcij ceuqceuj……” Sing duzroeg ciuz daj rog cueng cienz haeuj rwz gou daeuj, mbangi duz sing hung sing gok, lumj miz maz saehndei yaek gvangibo nei; mbangi duz haemq sing unq sing menh, lumj daxmeh gig unqswnh cingq gangjgoj hawj lwg dingq. Caemhcaiq miz geij duz roeg mwngz sing gou sing doxlwnz ciuz, lumj cingq gangjgoj nei…… Ha! Gij sing neix geijlai ndeidingq! Dingq gij sing gyoengqde, gou roxnyinh ndawsim gyoengqde itdingh gig angqyangz, gyoengqde itdingh gig doxgyaez dox-ndiep! Mbouj geizheih ne, gyoengqde youq gizneix miz bya miz raemx, gofaex raemhrwgrwg, hoengheiq seuq-setset, mbwn gvangq fwj noix, geijlai gyaeundei ha! Gyoengqde ndaej cwxcaih mbin bae mbin dauq, miz maz mbouj vuenyungz ne!

“Dad dad……dad dad……” Gij sing byaij roen loq gaenj neix cienz haeuj rwz gou daeuj. Mbouj yungh gangj, gou couh rox neix dwg gij sing byaij roen gyoengq hagseng lij doeg gauhcungh. Gyoengqde haet daengz 6 diemj cung hwnqcong, 6:30 guh caujcauh. Seizneix gyoengqde cingq gipgip muengzmuengz vaiq byaij bae giuzcangz yaek guh caujcauh ne. Gyoengqde mbouj yungzheih bw, haet hwnq caeux haemh ninz gyang, bouboux cingq vih saedyienh aen loqsiengj bonjfaenh roengzrengz hagsib, geijlai dwgrengz sinhoj hix aeu nyaenx dwk. Gyoengqde wnggai youq iq couh hag doxgaiq, mboujnex doeklaeng baengh maz youq gwnz-biengz ra gwn ra daenj. Doegsaw mbouj ndei hix rox ra ndaej faenh hong guh, lauheiq ndang baeg sim you lai lo.

“Sasa……sasa……” Gij sing sauq ranz cienz haeuj rwz gou daeuj. Mbouj yungh gangj, gou couh rox neix dwg boubaxtroen hainduj baet roen lo. De dwg mehmbwk ndaej 40 lai bi ndeu, byoemgyaeuj dinjdet daengz laj dujrwz, mbouj byom mbouj biz, yawj hwnjdaej gig seuqset. De youq ndaw hagdangz guh boubaxtroen gaenq miz cib bi doxhwnj lo. Hoeng, gou roxnyinh gij yienghceij de mbouj deng bienq geijlai, lijdwg mbouj byom mbouj biz, lumj mbouj rox bienq laux

nei. De bungz vunz cungj dwg riu-nyumnyum dongx vunz, gangj vah hix riuhaha, lumj mbouj miz maz simnyap gvaq. Ngoenznaengz cawz baet seuq gak diuz roen hagdangz, ndaej lingx faenh ngaenzhong neix, de lij gip gij nyapnyaj miz yungh bae gai bangbouj ndawranz, yienghneix daeuj ciengx boubxlaux lwgnyez, an’ onj gvaq ndwenngoenz.

Naemj daengz boubaxtroen neix, gou caiq naemj hwnj lingh boubaxtroen diengzhaex hagdangz. De hix dwg mehmbwk cungnienz lo, ndang haemq cangq, guh hong mizrengz youh vaiqvut, gangj vah sing haemq hung, bingzciengz mbouj haengj sien haibak gangj vah. Hoeng danghnaeuz mwngz caeuj de gangj vah hwnjdaej, de couh lumj mbok faexcuk dauj duhhenj nei sing hung sing riu gangj mbouj dingz. Miz ngoenz ndeu, de baet seuq diengzhaex le, doq swiq fwngz doq ciengq go, dinglingz gou byaij haeujbae ndaejnyi, sing go de seuqset rwenzred, cingzngaih unqmienz, ndeidingq raixcaix! Gou nyaenx mbouj ndaej danq naeuz: “Dahcej, mwngz ciengq go ndeidingq bw!” De dingqnyi le riuhaha cam gou: “Mwngz gangj dwg caen lwi? Caen ndeidingq?” Gou han naeuz: “Caen dahraix! Sing go mwngz seuqset youh goksasa, lumj cienmonz hag ciengq go gvaq nei.” De dingq gou yienghneix gangj le, sim’ angq

dangqmaz, riuhaha naeuz: “Mwngz naeuz ndeidingq, gou couh caiq lai ciengq song gawq hawj mwngz dingq!” De angq dwk riu lumj dujva nei, youh ciengq hwnjdaej, gou roxnyinh yiengh de dwggyaez lumj laeq lwgnyez nei……

——Ndwenngoenz dauqdaej dwg maz feihdauh? Gizsaed caezgya cungj roxnyinh youq ndwenngoenz ndawde, soemj van haemz manh, yienghyiengh cungj miz. Hoeng, vunzlai cungj dwg haengj gij feihdauh van ndwi. Gou roxnyinh gij van neix dauqcawq cungj miz! Caiq gangj vuenyungz dwg baenzneix genjdanh!

——Vuenyungz couhdwg lumj duzroeg nei, cwxcaih mbin youq gwnz mbwn gvangqlangh; vuenyungz couhdwg lumj gyoengq hagseng nei, vih loqsiengj haengqrengz bongh baenaj; vuenyungz couhdwg lumj boubxhaet nei, mbouj guenj dangqnaj miz geijlai haemzhoj, lijdwg riunyumnyum gvaq ndwenngoenz caemhcaiq roxnyinh rimhoz……

Ndwenngoenz vaiqvut lumj raemxlae, caemxcangh baenaj mbouj dauqlaeng. Hoeng, mbangjseiz raeuz wngdang caem roengzdaej, yunghsim bae saeqsaed dingq, menhmenh cimz, couh ndaej roxnyinh gij feihdauh ndawde dwg baenzneix diemz-swdswd……

Daengq Raeuz Ciengz Maranz

□ Luz Anhyungz / 陆安荣

Seizneix gij seiqgyaiq,
Vunz gig maij ciengq go;
Vih daengq gyoengq boubxcoz,
Gou doq ciengq geij coenz.

Daxmeh banhaemh ninz,
Foekfan ninz mbouj ndaek;
Lau lwg guhhong baeg,
Caekcaek geiq ndawhoz.

Daxmeh ciengx raeuz hung,
Cungj umj cungj baj haex;
Ngoenzgonq raeuz lij saeq,
Bae gyawz cungj aeu umj.

Mboujguenj raeuz baenzlawz,
Daxmeh mbouj rox yiemz;
Ngoenzhaemh cungj nyaenx niemh,
Lwg dauq diemz youq sim.

Gaj duzbit duzgaeq,
Baezbaez geiq louz ga;
Ngeix daengz aeu danggya,
Mbouj sij va ngaenzcej.

Raen lwg ndaej dauqma,
Daxmeh ra huq daiq;
Vah cam lai baenz gyaiz,
Siengjniemh lwg raixcaix.

Moix baez daengz cietheiq,
Mbouj dauq geiq cam ndei;
Daxmeh niemh ndaej deih,
Fouz feih gwn nohbyaek.

Raeuz ciengzseiz dauqma,
Ngonz ndaw gya boubxlaux;
Cawj byaek ndei gwnz cauq,
Daengz ranz ndaej nauhyied.

Dajgoeng okrog bae,
Seizseiz aeu roxleix;
Raeuz bae gyae hix ndaej,
Sim aeu geiq ndawranz.

Mbouj muengh ngaenz canh lai,
Gaeuq sai couh habbak;
Youq rog geijlai ak,
Sim miz cag gwq yien.



Gou Caeuq Guekcoj Duh Gou

□ Cangh Li swz Cinz Siengzcouh Veiz Suzyingh hoiz

Gou caeuq guekcoj duh gou
Yaep ndeu hix mbouj ndaej doxmbek
Mboujguenj gou bae daengz gizlawz
Cungj ciengq ok fwen haenh fwen danq
Gou ciengq gij goengq bya sang-sang haenx
Gou ciengq gij dahraemx laeswenz
Hoenz hwnj nyeuqnyeuq aen mbanj iqet
Gwnz roen miz diuz vunq
Guekcoj cei ndeigyaez duh gou
Gou ciengxlwenx cungj ing youq ndaw rungj duh mwngz
Mwngz yungh mwngz gij
Simgyaez daxmeh daeuj doiq gou gangj naeuz
Guekcoj duh gou caeuq gou

Lumj haij caeuq dujva raemxhaij
Vareamx dwg boubxlgw dahhaij
Dahhaij hawj vareamx ndaej ing
Youq mwh dahhaij riunyumnyum
Gou couhdwg aenbaenq riu de
Gou baen dawz gij youheiq dahhaij
Faenyiengj vaiqlag dahhaij
Guekcoj cei ndeigyaez duh gou
Mwngz dwg dahhaij raemx cungj mbouj hawq
Ciengxlwenx hawj gou raemx bik fubfab
Beijfwen ndawsim
Guekcoj cei ndeigyaez duh gou
Mwngz dwg dahhaij raemx cungj mbouj hawq
Ciengxlwenx hawj gou raemx bik fubfab
Beijfwen ndawsim